

AB OPERIBUS CHARITATIS NULLUS CONTEMPLATIVUS EXCUSATUR.

SCHOLIUM. Nullus proinde verè contemplativus ab omni opere charitatis erga proximum excusari potest: nam quantumvis solitarius ferventibus saltem orationibus et exemplis proximos juvare poterit; et quantumvis a sacerdotalibus remotus, uti Monachi et Moniales rigidissimæ observantiae, poterit verbis et operibus pietatis cum domesticis, superioribus, aequalibus et inferioribus, sanis et infirmis exerceri: id quod ad sacerdtales etiam utriusque sexus erga alios sacerdtales domesticos et reliquos pro ratione statutus eorum extenditur: quia omnis vera contemplatio sicuti *amorem Dei* et proximi debet accendere, ita et zelum animarum inflammare, per quem ea, quae sunt contra honorem et voluntatem Dei repellere studet. 2º Ultra hæc opera charitatis modò dicta proximis impendenda, quae operantem non extrahunt a ratione vitæ purè contemplativæ, subinde contemplatio, vel vocatio illi adjuncta contemplativum ad opera charitatis externa corporalia et spiritualia proximis impendenda excitat; imò ut hæc opera cum perfectione fiant, aliquæ contemplatione animari debent: corporalia quidem, ut elemosynas largiri, captivos redimere, infirmis inservire, saltem imperfecta contemplatione indigent, elevando intentionem ad Deum, unde manent in vitâ purè activâ: spiritualia verò, uti prædicare, docere, Sacra menta administrare, animas dirigere et gubernare etc., perfectiori egent contemplatione, si non omnino perfectâ, quae saltem per meditationem juvari debet, unde hujusmodi vita non purè activa, sed mixta vocatur. Hinc bene notat Rosignolius, l. 5 de *Discipl. Christ.*, c. 14 et 15; et post alia inquit: « Sit igitur indubitatum, eos, qui sine mortificatione et contemplatione se dant actuosa vitæ ad salutem animarum (nihil dico de necessitate aut hominum, aut officiorum) non esse in eo perfectissimo statu, quem ipsi putant, sibique eos in re hac tamdiu lenocinari ac fucum facere, quamdiu non elaboraverint pro viribus continuâ suâ victoriâ, et rectâ contemplandi ratione, eum tandem gradum attingere, cuius interim nomine sese oblectant. » 3º Cavenda tamen hic sunt duo extrema vitiosa, quorum alterum est, amore contemplationis deserere opera charitatis erga proximum sive corporalia, sive spiritualia, etiam dum obedientia, charitas, vocatio et aptitudo illa exigunt. Alterum est, ex charitatis et animarum zelo ita se totum his operibus tradere, ut vix ulla cura de interno mortificationis et orationis spiritu habendo, fovendo et retinendo remaneat: uti enim monet S. Augustinus, l. 19 de *Civ.*,

c. 49: « Otium sanctum querit charitas veritatis, negotium justum suscipit necessitas charitatis. Quam sarcinam si nullus imponit, percipiendæ atque intuendæ vacandum est veritati; si autem imponitur, suscipienda est propter charitatis necessitatem. Sed nec sic omnimodo veritatis delectatio deserenda est, ne subtrahatur illa suavitas, et opprimat ista necessitas. »

§ 321.

AMOR PROXIMI AD INIMICOS SE EXTENDERE DEBET.

Ita verò amor proximi effectus contemplationis esse debet, ut se etiam ad *inimicos* et *contradictores* extendat. Nam 1º in S. Scripturâ tam exempla quām sententiæ docent, quòd magis contemplativi et perfecti gravissima ab inimicis et contradictoribus suis passi fuerint, et bona pro malis generosè reddiderint. Exempla habemus in Jacob, Joseph, Job, Moyse, David et præcipue in ipso Christo Domino et suis Apostolis. Sententiæ prostant, *Prov. xxv, 21*: *Si esurierit inimicus tuus, ciba illum; si sitierit da ei aquam bibere: pruinias enim congregabis super caput ejus, et Dominus reddet tibi. Matth. v, 44*, et *Luc. vi, 27*: *Ego autem dico vobis: diligite inimicos vestros, benefacite his, qui oderunt vos etc. Rom. xii, 14*: *Benefacite persequentibus vos: benedicte et nolite maledicere. Et 21: Noli vinci a malo, sed vince in bono malum.* 2º Patres probant esse perfectorum et consequenter contemplativorum, perfectè diligere inimicos. S. Hieronymus, in c. v. *Matth.* ait: « Deum non impossibilia præcipere, sed perfecta; » Id quod in David, Stephano, Paulo ad Christi exemplar probat. S. Chrysostomus, *Hom. 18 in Matth.*, docet dilectionem inimicorum esse majus quid in ordine perfectionis: « Videlicet ista facientem nulli prorsus esse inimicum: » imò, « Quod potius est, atque perfectius, etiam illius, a quo læditur, amicum. » S. Augustinus, in *Ezech.*, c. 72, juxta illud: *Diligite inimicos vestros*, ait: « Perfectorum sunt ista filiorum Dei, quo quidem se debet omnis fidelis extendere et humanum animum ad hunc affectum, orando Deum, secumque agendo,

fuctandoque perducere. » S. Gregorius, *Hom. 38, in Evang.*, post med. ait: « Charitas vera est, cum et in Deo diligatur amicus et propter Deum diligit eos, quos diligit, qui jam et eos diligere, a quibus non diligitur, scit: probari enim charitas per solam odii adversitatem solet. » Similia habet Cassianus, *Collat. 16, c. 26, 27*; S. Bernardinus, t. 2, *Serm. 50*; S. Laurentius Justin., l. de *Char.*, c. 13, 14; Blosius, *Inst. spir.*, c. 2. 2º Ratio est: contemplatiyi est insistere perfectioni et cum perfectione operari: sed perfectio nunquam melius exercetur, quam in speciali dilectione inimicorum et contradictorum propter Deum. Ergo a contemplativis haec dilectio specialiter exercenda est.

SIGNA VERÆ DILECTIONIS INIMICORUM.

SCHOLIUM. Signa veræ et perfectæ dilectionis inimicorum sunt sequentia: 1º Orare pro inimicis, *Matth. v, 44*: *Orate pro persecutibus et calumniantibus vos.* 2º Benè de inimicis loqui, *Luc. vi, 28*: *Benedicite maledicentibus vobis.* Et *Rom. xii, 14*: *Benedicite persecutibus vobis; benedicte, et nolite maledicere.* 3º Inimicos salutare, *Matth. v, 47*: *Si salutaveritis fratres vestros tantum, quid amplius facitis? Nonne et Ethnici hoc faciunt?* 4º Inimicis benefacere, *Matth. v, 44*: *Benefacite his qui oderunt vos.* *Luc. vi, 27, 33 et 35*: *Si benefeceritis his qui vobis beneficiunt, que vobis gratia?* *Siquidem et peccatores haec faciunt.* Et *Rom. xii, 21*: *Noli vinci a malo, sed vince in bono malum.* 5º Mutuum dare etiam inimicis, *Matth. v, 42*: *Volenti mutuari a te ne avertaris.* *Luc. vi, 34*: *Si mutuum dederitis his a quibus speratis recipere, que gratia est vobis?* *Nam et peccatores peccatoribus fænerantur, ut recipiant aequalia.* 6º Gratis dare etiam inimicis, *Matth. v, 42*: *Qui petit a te, da ei.* *Luc. vi, 30*: *Omni petenti te tribue; et qui auferat que tua sunt, ne repetas.* *Et prout vultis ut faciant vobis homines, et vos facite illis etc.* 36: *Estote ergo misericordes, sicut et Pater vester misericors est.*

§ 322.

AMOR PROXIMI AD ANIMAS IN PURGATORIO EXTENDI DEBET.

Denique amor proximi contemplativum etiam ad orandum et satisfaciendum pro *animabus Purgatorii* impellere debet. Sic monet 1º S. Scriptura, *Eccli. vii, 37*: *Gratia dati in conspectu omnis viventis, et mortuo non prohibeas gratiam.* Et *II Mach. xii, 46*: *Sancta et salubris est cogitatio, pro defunctis exorare, ut a peccatis solvantur,* quod sanè contemplativis maximè convenit. 2º Hortantur ad hoc PP. S. Dionysius, c. 7 de *Eccl. hierar.*, de Antistite in exequiis fidelium dicit: « Petit illa compleri, indulgerique iis, qui piè vixerint, sacra præmia: simulque semelipsum benignè conformans ad imitationem Dei, non secus aliis, quam sibi ipsi, dona possens ac gratias. » Quod ab omni etiam contemplativo faciendum est. S. Chrysostomus, *Hom. 21, in Act.*, sub fin. docet: « Non frustra oblationes pro defunctis fiunt, non frustra preces, non frustra eleemosynæ. Hæc omnia Spiritus disposuit, volens ut nos mutuum juvemus. » S. Bernardus, *Serm. 42, de divers.*, ait: « Surgam ergo in adjutorium illis, interpellabo gemitis, implorabo suspiris, orationibus intercedam, satisfaciām sacrificio singulari... Percurre ergo, quæcumque es anima fidelis, regionem expiationis, et vide quid in èa fiat; et in nundinis istis fac sarcinam tuam, affectum compatiendi. » Videri etiam possunt Gerson, *Serm. 1, pro Def.*; et Blosius, l. 2, *Enchir. parv.*, c. 4, dicens: « Porrò pius et suavis Dominus ipsas Electorum suorum animas, quas post mortem carnis adhuc purgare necesse est, in tantum diligit, earumque liberationem tam ardenter desiderat, ut si nos benignè charitate moti pro illarum liberatione fideliter precemur et adorandam sancti Altaris hostiam, aut quælibet alia salutaria offeramus peragamusve, hoc non minus gratum habeat, quam si eumdem Dominum nostrum carcere conclusum consolatio-

nibus relevare studeamus : ipse enim dixit, *Matth. xxv, 40* : *Quod uni ex minimis meis fecistis, mihi fecistis.* » Accedunt plurimæ revelationes et visiones a Raynaudo, in *Heterod. spir. sect. I*, punct. 6, relatæ, S. Christinæ, S. Lidwinæ, S. Lutgardis, S. Gertrudis etc., in quibus hæ animæ contemplativæ ad orandum et satisfaciendum pro defunctis impulsæ sunt. 3º Ratio est : de fide est Sanctos omnes aut justos habere inter se bonorum operum spiritualium communionem; sed animæ in purgatorio sunt sanctæ et justæ; ergo cum vivi justis hanc communionem habent : cùmque sint summè indigentes, nihil huic veritati conformius quām ut justi vivi ad subveniendum illis moveantur, et quidem nullis hoc magis convenit quām contemplativis, quorum tota intentio ad perfectionem per charitatem Dei et proximi dirigi debet, potissimum verò proximorum maximè indigentium, a quorum subventione nequeunt excusari. Vide Mansi, *Tr. 86 Biblioth. mor.*; Bona, in *Div. Psalmod.*, c. 13; Benedictum Papam XIII, t. 3 *Oper.*, serm. 19.

QUOMODO JUVARI POSSINT.

SCHOLIUM. Animæ in purgatorio per omnia bona opera justorum vivorum, in quantum sunt satisfactoria ad satisfaciendum pro reatu peccatarum, juvari possunt, ex communi Theologorum cum S. Thomâ, in 4 d. 45, q. 2, a. 3, quæstiunc. 1. Quia omnia opera vivorum bona aliquam afferunt molestiam, unde possint satisfacere, et ob unionem in charitate justi vivi pro justis defunctis tanquam illorum fidejussores suis satisfactionibus eorum satisfactiones compensare possunt. Quod tamen non de operibus faciendis ex nunc applicatis, sed de operibus actu exercitis intelligentem esse ex communi sensu Ecclesiæ monet Reguera, *Th. Myst.*, t. 1, pag. 849; II, 421. Scilicet, quod tunc solum defunctis prosint, quando in suâ executione opera complentur. 2º Potissimum inter præcipua suffragia pro animabus purgatorii est sacrificium altaris. 3º Animæ purgatorii etiam per indulgentias juvari possunt et per eleemosynas. 4º Per jejunium et omnia opera externa mortificatoria, quæ utique sunt satisfactoria et aliis justis applicari possunt. 5º Per orationem tum publicam, tum privatam, sive prout est satisfactoria, vel impetratoria. 6º In genere melius est suffragari defunctis ex

zelo charitatis proximi, quām non suffragari ex zelo justitiae divinæ, quia illud Deo paternè punienti magis placet, licet in casu raro ex speciali inspiratione possit fieri, quòd Deo magis placeat optare totum rigorem justitiae non quidem in animas aliorum, sed ad summum contra se, ut S. Catharina Januensis fecit, quæ ob hunc actum heroicum, non omnibus commendabilem, a poenis purgatorii liberari meruit, cùm solum de purgatorio hujus, non verò alterius vite locuta fuerit. 7º Per se loquendo etiam melius est, ex charitatis zelo præfatis animabus omnes suas satisfactiones illis applicabiles cedere, quām sibi reservare, quia est se offerre ad differendam propriam beatitudinem, ut illæ animæ purgantes quantocius fruantur, quod est heroicum et cum lucro in bonis spirituallibus incompatibile, utpote, quæ potius exinde augentur, et ob hunc actum heroicum compendiosior a purgatorio exemptio liberaliter obtineri poterit, uti patet ex S. Gertrude, l. 5, c. 41. Haec tamen cessio plenissima non omnibus indiscriminatim, sed perfectioribus et quidem pro ratione inspirationis divinæ, suadenda est, quia inconveniens videtur esse liberalem erga defunctos in satisfaciendo, si quis negligat plura facere, quibus pro propriâ satisfactione indiget; unde nec Ecclesia omnes indulgentias defunctis applicare concedit. Quare multò minus ex voto hæc cessio, vel suffragiorum sibi post mortem obventurorum, passim facienda est, tum quia non est semper de meliori bono, et suffragia illa, obventura, nisi donatio vivo facta esset, ejus dispositioni non subsunt. Nec magis placet minuta aliqua satisfactionum distributio, et quasi monetam optimè notam numerare, et cum Deo per rationes dati et accepti mercaturam facere : prudens enim supplicantium reverentia dictat, ut humiliter tenuissimorum operum nostrorum satisfactiones simul cum meritis Christi quotidie offeramus, illas vel omnes, vel pro medietate, vel aliter juxta uniuscujusque devotionem, a Directore approbatam, defunctis applicantes, et quidem primò secundūm obligationem, si quæ adsit: deinde secundūm ordinem charitatis propinquis sanguine, vel spiritu, vel animabus magis indigentibus, et, ad vitandas ambiguitates, ad id quod a me Deus, juxta majus suum obsequium, in bonum proprium et defuctorū vult fieri.

§ 323.

UNIO ILLAPSUS PASSIVI.

Tertia unio animæ cum Deo consistit in excellentiori quodam gradu contemplationis, et est unio contemplativi *illapsus*

passivi. Illapsus autem iste, ultra illapsum substantialem omni justo communem, addit experimentalē sensationem de Deo in animam illapso; omnes animae potentias suspendit ab actibus qui distrahanter a Deo et modo perfectius Deum intelligendi et amandi; eo quod creature, tantum vix, nutu proprio consentiens per actus a Deo ipso impressos, eum intelligat et diligat cum experimentalē et quasi palpabili tam mentis quam cordis perceptione; quod anima se totam Deo imbutam inventiat et veluti in suā fundo profundissimo Deum ipsum inventiat, in quo ipsa velut annihilata disparet, solumque ardenter amat esse in Deo suo. Ita Règuera, *Th. Myst.*, t. 1, pag. 911, n. 735, et t. 2, pag. 194, n. 538.

EXPLICATUR.

SCHOLIUM. Omnes Mysticī conveniunt dari specialem unionem animae cum Deo, quam *illapsum passivum, unionem mysticam, mortem mysticam, annihilationem, sponsalitum, osculum, et castum amplexum animae* vocant, uti ex dicendis patebit. Verū explicare qualis sit hæc specialis unio, hoc opus, hic labor est, et eò quidem difficilior, quod magis abdita, ideoque antonomasticè Theologia Mystica, vel sumnum Mysticæ, hæc unio appellatur, de quâ nonnisi per paucos et expertos testes constat, et qui de illa tanquam de re ineffabili loquuntur. Ut proinde in re adeo sublimi cum gratiâ divinâ, eò clariori, quod fieri potuit, ordine progrediamur, et errores, qui in eâ obviare possunt, declinemus; observandum est illapsum Dei in creaturas varium esse, Deumque variis modis creaturis uniri. Primus est per intimam Dei existentiam in omni re creatâ, per essentiam, præsentiam et potentiam. De quo cum omnibus rebus creatis sit communis, hic sermo non est. Secundus illapsus est per gratiam in animam justi, per missionem invisibilim, quæ sit in omni justificatione, adeoque nec de illo hic agitur. Tertius est illapsus specialis passivus in contemplatione, quo juxta P. Alvarez de Paz, t. 3, *de Vit. spir.*, l. 5, p. 3, c. 5: « Vires animæ omnes quasi in altum maris Divinitatis provehuntur, vel Deo immersæ ad summam quamdam lucem et ardorem elevantur. » De quo hic agimus. 2º Vocatur hic illapsus *passivus*, quia juxta citatum P. Alvarez: « In eo anima non tam agit, quam recipit, non progreditur, sed abripitur: et non exspectato consensu ejus (et tamen consentit) in thalamum incredibilis suavitatis ducitur. » Id

quod ex dicendis clarius apparebit. 3º In hac unione illapsus passivi dicuntur suspendi omnes potentiae animæ, sed non omnino; solum verò quoad actus, qui a Deo distrahunt. 4º In eadem actus intelligendi et amandi a Deo imprimuntur, ita ut creatura vix nutu proprio consentiat, licet reipsa consentiat, et verè, et vitaliter ipsa intelligat et diligat, uti paulo inferius demonstrabitur. 5º In eodem hoc illapsu, anima, experimentalē et quasi palpabili mentis et cordis perceptione, se totam Deo imbutam reperit, uti pariter ex dicendis patebit. 6º In hoc ipso illapsu anima in Deo velut annihilata disparet, quæ annihilationis, mors mystica, sponsalitum, osculum, et castus amplexus etiam inferius explicabitur.

§ 524.

DATUR CONTEMPLATIO PASSIVA.

Datur gradus contemplationis *passivæ*, quæ licet sit activa intelligendo et amando, comparativè tamen ad Deum, a quo recipit intelligere et amare, vix aliud facit quam pati. Insinuat̄ur haec contemplatio passiva 1º a S. Scripturâ, *Rom. viii, 14: Quicunque spiritu Dei aguntur, hi sunt filii Dei.* Quod S. Thomas, *Lect. 3*, ita exponit: « Similiter autem homo spiritualis non quasi ex motu propriæ voluntatis principaliter, sed ex instinctu Spiritus S. inclinatur ad aliquid agendum. » Et hoc probat ex *Isa. lxx, 19*: Cùm venerit quasi fluvius violentus, quem spiritus Domini cogit. » Et *Luc. iv, 1*, de Christo, quod agebatur a spiritu in desertum. Et demum subdit: « Non tamen per hoc excluditur, quin viri spirituales per voluntatem et liberum arbitrium operentur. » 2º Hanc passivam contemplationem indicat Cassianus, *Coll. 9*, c. 30, dicens ex S. Antonio: « Non est perfecta oratio, in quâ se Monachus, vel hoc ipsum quod orat, intelligit. » Eamdem explicat Joannes a Jesu Mariâ, *Th. Myst.*, c. 6, docens in eâ non prorsus deficere potentiarum actus: « Sed esse actus adeo tranquillos et suaves, ut cum aliis incitatis actibus, quos paulo ante eae potentiae proferebant, comparati, eamdem proportionem habere videantur, quam elatus sermo habet cum voce submissâ, quâ si

quis utatur juxta cœnobiticam disciplinam, silentium dicitur observare. Quæ sanè responsio captu facilis est: præsens quippe tunc Deus, et animæ amantissimè blandiens, tam cœlesti suavitate eam ad intelligendum et amandum permovet, ut ipsa non se agere, sed suavissimè duci et quasi erumpentes ultro a potentiss actus non tam producere quām pati videatur. Et hæc fortasse illa insignium herorum passio, quam Hierotheus sustinebat. » Qui juxta S. Dionysium, *de Div. nom.*, c. 3: « Ista non docendo tantum, verum etiam divina patiendo assecutus: nec non eorum, si dictu fas sit, compassione, ad illam, quæ doceri nequit, fidem mysticam atque unionem informatus. » Plura vide apud Philipp. a SS. Trin. *Disc. proœm.* c., Sandæum, l. 2, *Com.* 4, *Exerc.* 3, *Disc.* 10, et apud Didacum a Jesu, *Annot. ad S. Joan. a Cruc. disc.* 1. 3º Ratio hæc est: in contemplatione passivâ anima movetur a Deo modo plusquam regulari humano, ut intelligat simplici solum intuitu, imò simplici solum quasi auditu: item moveatur etiam irregulariter, ut amet non solum instar volentis, sed etiam instar currentis, quin et instar volantis eò penetrando dentissimè, quòd non pertingeret cognitio, quæ proinde quasi suffocatur, ut nihil reflexè cogitet, sed tantum amare videatur: sed hoc est singulariter, et respectu Dei principaliiter moventis pati, licet anima etiam agat: Ergo contemplatio passiva datur.

SOLVUNTUR OBJECTIONES.

SCHOLIUM. Contemplationem passivam nonnulli mystici ita explicant, ut in eâ quidem requirant actus intellectûs et voluntatis animæ, non tamen ut a suis potentiss physicè fiant, sed a solo Deo; animâ contemplati merè passivè physicè se habente. Verum hæc opinio ex professo inferius refutabitur: nihilque huic nostræ conclusioni obstat amplius videtur, quām quod modò dictum est, voluntatem posse esse intensiorem et perfectiorem, præviâ cognitione. Verum ferè omnes admittunt, etiam in naturalibus posse quid naturaliter perfectius amari, quām sit cognitio: quod S. Thomas, 1, 2, q. 27, a. 2, ad 2, ita probat: « Ad perfectionem cognitionis requiritur, quòd homo cognoscat singillatim, quidquid est in re,

sicut partes, et virtutes, et proprietates: sed amor est in vi appetitivâ, quæ respicit rem, secundùm quod in se est: unde ad perfectionem amoris sufficit, quòd res, prout in se apprehenditur, ametur. Ob hoc ergo contingit, quòd aliquid plus ametur, quām cognoscatur, quia potest perfectè amari, etiamsi non perfectè cognoscatur. » Id quod in scientiis probat, quas aliqui amant, licet nonnisi summarie cognoscant. Et S. Bonaventura illud in specie de contemplatione probat, in 5 et 7 *Itiner. aeternit.*, d. 5, docens: « Ex his igitur patet planè, quod actus dilectionis excellit, et præcedit actum cognitionis intellectualis in aliquo gradu: in quantum autem eum excellit, in tantum eum excedit, attingendo Deum in aliquo gradu dilectionis, ad quem actus intellectualis extendi non potest, qui superintellectualis est, saltem in hac vitâ. » Et Hugo Victorinus, in c. 7 *de Cœl. Hier. col.* 4, ait: « Plus diligitur, quām intelligitur: et intrat dilectio, et appropinquat, ubi scientia foris est. » Quorum omnium ratio est, qui cognitio ad amandum prærequiritur, non ut objectum motivum, sed ut conditio applicans objectum motivum, quod est bonum objectivum.

§ 325.

IN CONTEMPLATIONE PASSIVA ANIMA SINE COGNITIONE NON AMAT.

Porro ex § præc. fluit quòd etiam in contemplatione passivâ anima non eliciat actum amoris, *sine prævia intellectione*. 1º Enim S. Scriptura in sublimissimis etiam animarum contemplationibus semper indicat, intellectum otiosum non fuisse, sed aliquid a Deo doctum percepisse. Sic Adamus in suo somno extatico, *Gen.* 11, 21 et 23, Jacob in somno scale, *Gen.* xxviii, 12. Uterque Joseph in suis somnis. S. Paulus in suo raptu extatico, *II Cor.* xii, 4. Et anima sancta summè contemplativa, *Cant.* v, 2, in suo intellectu a Deo illustrato aliqua cognoverat. Unde S. Augustinus ait, *Tr. 57, in Joan.*: « Quid est, ego dormio et cor meum vigilat, nisi ita quiesco ut audiām? » Si ergo tam veteris quām novae legis contemplativi, etiam Prophetæ, *Num.* xii, 6, ad mundum universum, nunquam sine instructione intellectuali a Deo, et ad Deum extra

se rapti sunt, quis credat, aliis non tam famosis alium contemplationis modum sine intellectione purè affectum esse reservatum? 2º Patet ex PP. quos, § 286, allegavimus, qui etiam in oratione silentii suspensionem animæ ab omni actu intelligendi non admittunt: quibus accedit S. Augustinus, l. 10 de *Lib. arbit.*, c. 1: « Rem prorsus ignoratam amare omnino nullus potest. » Et S. Gregorius, *Hom. 36 in Evang.*, sub init. : « Quis amare valeat quod ignorat? » S. Anselmus, in med. c. 50: « Nulla res amatur sine suī memoriā aut intelligentiā: et multa tenentur memoriā, aut intelliguntur, quae non amantur. » S. Thomas, l. 1, 2, q. 3, a. 4, docet: « Cognitio prævia est dilectioni in attingendo, non enim diligitur nisi cognitum. » Gerson ipse, qui pro contrariā sententiā allegatur, *Tr. 5, sup. Magnif.*, sub fin., ait: « Ostendamus quòd Deus per amorem cognosci non potest, sine cognitione præviā et comite. » S. Theresia in sublimi illā contemplatione, ubi nesciebat quid anima sua ageret, *Vit.*, c. 18, sub fin., subdit dictum sibi esse a Domino: « Animam quidem non posse tunc comprehendere quid intelligat: est quippe intelligere non intelligendo. » Et S. Joannes a Cruce, in *Flam. amor. Cant.* iii, 3, § 10, dicit in sublimi etiam contemplatione: « Aliquando plus intelligentiæ sentitur quàm amoris, aliquando plus amoris intensi quàm intelligentiæ. » 3º Ratio est: quia omnis contemplatio est simplex intuitus veritatis, sive elevatio mentis in Deum per simplicem intuitum ardentissimè affectuosum, § 248, quod non fit sine cognitione, ergo etiam contemplatio passiva: maximè quia nequidem in humanitate Christi in viâ, nec in SS. Deiparâ, nec in aliis Sanctis assignari potest, fuisse contemplationem amatoriam sine cognitione.

SOLVUNTUR OBJECTIONES.

SCHOLIUM. Nonnulli mystici volunt, in contemplatione passivâ solam voluntatem operari suum intensissimum actum amoris aut fruitionis Dei, intellectu contemplativi, cognitione actu præviâ nihil conferente, sed vel solùm in instanti, aut tempore præcedente,

præviâ, vel solùm concomitante, aut naturâ subsequente pro eodem instanti, vel etiam nullâ, sed Spiritu S. repente, nullâ habitâ ratione intellectûs, voluntatem ad se rapiente. Ita docet Auctor, *Opusc. de Th. myst.*, q. fin. inter opuse. S. Bonaventure, cum quo sentire videtur Gerson, *Tr. elucid. schol. myst. Th. 1*. Quia *Psalm. xxxiii*, 9, dicitur: *Gustate et videte*, quod S. Gregorius, *Hom. 36, in Evang.*, S. Basilius et S. Thomas in expos. *hujus Ps.* de contemplatione explicant, in quâ priùs est corde amare quàm mente videre. *Resp.* In dicto loco non excluditur omnis prævia cognitio, sed tantum specialis, quæ per gustum Dei et rerum spiritualium, maximè per contemplationem acuitur et redditur experimentalis, id quod solùm citati Patres intendunt. 2º Joannes a Cruce, in *Edogā, cant. 18*, ait: « In viâ supernaturali bene potest Deus infundere amorem, eumque augere, quin imprimat, augeatve intelligentiam distinctam. » *Resp.* S. Mysta non omnem intelligentiam, sed solùm distinctam excludit. 3º P. Alvarez, t. 3, *de Vit. spir.*, l. 4, p. 3, c. 8, refert se novisse aliquem pium et doctum virum, qui amorem sibi inesse sœpe sine ullâ cognitione testatus est. *Resp.* Amor solùm in eo adeo intensus fuit, ut videretur quasi disparuisse omnis cognitio.

§ 326.

IN CONTEMPLATIONE PASSIVA ANIMA PHYSICÆ INTELLIGIT ET AMAT.

Rursus in contemplatione etiam passivâ anima per intellectionem cognoscit, et per volitionem amat, ita ut *physicē* tales actus eliciat. Nam 1º S. Scriptura semper contemplationem per actus vitali et activo modo animæ proprios exponit. *Ps. xlvi, 11: Vacate et videte etc. Coloss. iii, 3: Mortui estis et vita vestra etc.* Unde etiam Tridentinum, *Sess. 6, c. 10*, cooperationem hominis in justificatione, consequenter etiam in promovendâ illâ per contemplationem, requirit et quidem non solùm cooperationem moralem, sed etiam physicam, sine quâ moralis esse vix potest. Idem docent 2º PP. S. Gregorius, *Hom. 14, in Ezech.* ait: « Contemplativa vita est charitatem quidem Dei et proximi totâ mente retinere, sed ab exteriore actione quiescere, soli desiderio Creatoris inhaerere. » Cassianus, *Collat. 9, c. 24*, etiam in summo contemplationis

gradu ait : « Quòd mens tanta proferat in illo brevissimo temporis puncto, quanta nec eloqui facile, nec percurrere in semetipsam reversa valeat. » Et S. Thomas, 2, 2, q. 179, a. 1, ad 3, ait : « Ipsum contemplari est quidam motus intellectus. » 3º Ratio est, quia omnis contemplatio est oratio mentalis, adeoque ascensus mentis ad Deum; quod etiam contemplationi passivæ convenit. Ergo non sit sine cognitione et amore physicè elicitis.

REFERTUR SENTENTIA ALIQUORUM MYSTICORUM.

SCHOLIUM. Nonnulli Mysticī docent requiri quidem in contemplatione passivā actus intellectus et voluntatis, non tamen quòd a suis potentīs physicè fiant, sed de facto a solo Deo fieri; animā contemplatiū merē passivē physicè se habente. Qui tamen ex modo dictis sufficienter refutantur.

§ 327.

MORS MYSTICA.

His suppositis, gradus contemplationis passivæ modò asserendi et explicandi veniunt, quorum primus est *mors mystica*, quæ fit per separationem animæ a carne, non quidem effectu, sed affectu, quatenus per vehementis amoris ictum resecat, separat et absumit omnem carnis et proprii amoris effectum, ita ut solus amor Dei vivificus prævaleat. Hanc insinuat 1º S. Scriptura, *Cant.* viii, 6 : *Fortis est ut mors dilectio. Coloss.* iii, 3. *Mortui estis et vita vestra est abscondita cum Christo in Deo. Philip.* i, 21 : *Mihi vivere Christus est et mori lucrum.* 2º Accedunt PP. S. Ambrosius, 1. *de Bon. mort.*, c. 2, mortis hujus mysticæ expressè meminit, eamque describit. S. Gregorius, 1. 8 *Mor.* c. 28, ait : « Qui Deum videt, eo ipso moritur quo vel intentione cordis, vel effectu operis ab hujus vitæ delectationibus totâ mente separatur. » S. Bernardus, *Serm.* 52, in *Cant.* : « Est et mors, quod non dubius

dixerim, quoniam Apostolus quosdam in carne adhuc viventes commendando, sic loquitur : *Mortui estis etc...* Talis, ut opinor, excessus aut tantum, aut contemplatio dicitur. » Richardus, *de Extermin. mali*, c. fin. : « Vides certè quid agat, et intelligis, ut arbitror, quid valeat illa divisio animæ, spiritus... Spiritus ab infimis dividitur, ut ad summa sublimetur. » Et Joannes a Jesu Mariâ, *Can. 13 ad Theol. myst.* : « Animam mori, propriam formam amittere, spiritum viribus actione ne destitui, a Deo, sine proprio scilicet concursu, agi, et id genus alia amantibus frequentissima; si naturam rerum spectemus, falsa, si affectum, vera dicemus. Philosophus enim non accusatur mendacii, quòd animam potius, ubi amat, quàm ubi animat, esse protulerit : nec Paulus, quòd se viventem non vivere, quasi ejus vitam Christi præsens vita perimeret, affirmat. » Accedit S. Salesius, 1. 7 *Div. am.*, c. 9, et Bona, in *Div. Psalm.*, § 2. 3º Ratio est : Contemplatio passiva, supposita omnimodâ mortificatione passionum ex unione specialissimâ cum Deo per amorem, facile contemnit amare quidquam extra Deum; et quidpiam aliud cogitare, et eum plus et potius amare quàm desiderat : ergo meritò Antonomasticè mors mystica appellatur.

§ 328.

ANNIHILATIO MYSTICA.

Secundus gradus contemplationis passivæ est *annihilatio mystica*, per quam contemplativus agnoscit se comparativè ad Deum esse nihil, imò minus quàm nihil, per peccatum, adeoque etiam velut nihilum, et minus quàm nihilum, contemni desiderat, et quasi nihilum in se nihil etiam boni operari, sed totum a Deo quasi per creationem recipere aestimat. Innuit hanc annihilationem : 1º S. Scriptura, *Ps. LXXII*, 22 : *Ego ad nihilum redactus sum, et nescivi. Et Ps. XXXVIII*, 6 : *Substantia mea tanquam nihilum ante te. Quod 2º ita exponit S. Augustinus* : « Ante te, Domine, nihil substantia mea, ante

te, qui vides hoc : et ego cùm hoc video, ante te video, ante homines non video. Quid enim dicam? Quibus verbis ostendam nihil esse quod sum in comparatione ejus, quod est? Sed intus dicitur, intus utrumque sentitur: ante te, Domine, ubi oculi tui sunt, non ubi oculi humani sunt. Quid ubi oculi tui sunt? Substantia mea tanquam nihil. » Et S. Bernardus, *Serm. 4, Adv.* ait: « Humilis corde duplē agnoscit humilitatem, quarum altera cognitionis, altera affectionis, quæ hic dicitur cordis. Priore cognoscimus quod nihil sumus. » De posteriore ait: « Hanc ab illo discimus qui exinanivit semetipsum. » Et Harpius, l. 2, *Theol. myst.*, p. 3, c. 33: « Anima, quām citò recipit gloriosam illam imaginem æterni speculi in suā incomprehensibili claritate, eodem momento unitur eidem incomprehensibili et gloriose, claro, divino speculo, et in eo absorbetur, dilatatur et annihilatur. » 3º Rationem dat Sandæus, *Lib. 2, comment. 6, exercit. 9 Th. myst.* dicens: « Qui ita mutatur ut nihil præcedentium consuetudinum, nihil imperfectionum, nihil desideriorum carnalium retinere videatur, hoc modo annihilari dicitur... Amore unitivo ita omnia absumente, ut ne cinis quidem ex stipulâ, quam combussit, remaneat. » Sed hoc sit in contemplatione passivâ: ergo in eâ datur mystica annihilationis.

REFERUNTUR ERRÖRES.

SCHOL. I. Michael Molinos perversam annihilationem per plurimas propositiones propinavit, et inter alias *prop. 12* docuit: « Qui dedit liberum arbitrium Deo, non debet curare de ullâ re, nec de inferno nec de paradiiso, nec de habendo desiderio suæ propriæ perfectionis nec virtutum, nec propriæ sanctitatis, nec propriæ salutis, a cuius etiam spe se purgare debet. » Et *prop. 13*: « Dum consignatum fuerit liberum arbitrium Deo, illi debet relinquiri cura et cogitatio omnium rerum nostrarum, et permitti ut in nobis sine nobis suum divinum faciat velle. » Et Archiepiscopus Cameracensis, *prop. 6*, docuit: « In hoc sanctæ indifferentie statu nolumus amplius salutem, ut salutem propriam. » Verum perversum kunc annihilationis abusum in Molinos meritò damnavit Innocentius XI. Et per nimium etiam, licet ex bona intentione, excessit Camera-

censis singendo statum proprium et habitualem hujus eminentissimi amoris Dei, qui solùm subinde pro ratione inspirationum divinarum actualium conceditur, et iterum aufertur. Sensus tamen spiritualis, quem de se refert D. de Berniens Louvini in suo *interior. Christ.*, l. 1, c. 11, licet videatur sanum sensum prædictum admittere, maximè si conferatur cum ejus doctrinâ, t. 8, c. 3, cautè tamen legendus, nisi corrigatur; id quod etiam in editione germanicâ Coloniæ factum est.

ET DICTA ALIQUORUM MYSTICORUM CORRIGUNTUR.

SCHOL. II. Ex dictis etiam explicari et in congruo sensu exponi poterunt, quæ in nonnullis Mysticis de contemplatione passivâ, morte et annihilatione mysticâ leguntur. Non tamen est cur laboremus in explicatione omnium auctorum qui, sub titulo *Mysticæ*, docent quæ nescimus unde haebant, et quæ nec solida, imò fortè periculosa videntur. Quare P. Reguera, *Th. myst.*, t. 2, pag. 186, n. 491, non omnino probat, quæ Petrus Pictaviensis Capucinus Gallus, in suo *Die mystico*, de his rebus minutissime docet, qui fortè cautius locutus fuisset, siabus in novis pseudo-illuminatis damnatos vidisset. Multòque minus probat, quæ in Josephi a S. Mariâ *Ascensu animæ ad Deum* leguntur. Præterea Achilles Gagliardus, in *Comp. perf. Christ.* illam per tres status cum gradibus suis ad perfectionem dirigit. In primo vi annihilationis per cognitionem et affectionem proprii nihil dicit ad abnegationem, subtractionem et conformitatem, non modò in ordine ad bona externa, sed etiam interna, consolationum, imò et nimii minus puri desiderii virtutum, et impedimentorum ad earum exercitium; item desolationum supervenientium, et subtractionis actuum reflexorum, solis directis permanentibus. In secundo statu ponit, posse a Deo subtrahi concursum ad actus virtutum directos uno actu conformitatis relicto, et quidem non activè, sed passivè, quatenus liberè acceptat anima, quod Deus subtrahit, aut facit; quod est propriè *pati divina*. In tertio statu posse animam ulteriori ad hoc devenire, ut abstineat ab hac etiam passivâ conformitate, quatenus potest cedere omni liberae volitioni suæ; quam cessionem Deus acceptare valet, omnem actum subtrahendo, vel si novos actus concedat, eos acceptat anima, non quia sùi, sed quia Dei sunt. Primus horum statuum facile intelligitur: secundus et tertius explicationem per se insinuant, quia in hoc purè pati, scilicet relatè ad agere nutu proprio volentis, notatur acceptatio libera: et in eodem ipso non agere, scilicet cooperativè, notatur, agere ani-

mam, quando Deus vult, non proprio, sed Dei nutu. Eodem modo explicandæ nonnullæ fortiores expressiones S. Salesii, l. 9, *de Amor. Dei*, c. 46: ubi gradum amoris admittit, qui nec est acquiescere, nec acceptare; quo adveniente expectatio in consensum vertitur.

§ 529.

ILLAPSUS PASSIVUS.

Tertius gradus contemplationis passivæ est *illapsus passivus*, qui ultra illapsum substantialem omni justo communem addit experimentalem, spiritualem sensationem de Deo in animam illapo, § 323. Hic insinuatur 1º a S. Scripturâ, *Cant.* 1, 1: *Osculetur me osculo oris sui.* Et 11, 6: *Læva ejus sub capite meo et dextera illius amplexabitur me.* Ubi divinum osculum ab animâ contemplativâ desideratum, experimentalem quasi contactum, quo suavietur Deum sponsum suum præsentem; et amplexus tenerrimus expertam sponsi correspondentiam significat. Rursus, *Ps. lxii*, 9: *Adhæsit anima mea post te, me suscepit dextera tua.* Et *Ps. lxxii*, 28: *Mihi adhærere Deo bonum est.* Et Joannis xiv, 21: *Qui diligit me, diligetur a Patre meo, et ego diligam eum, et manifestabo ei me ipsum.* Et I Cor. vi, 17: *Qui adhæret Domino, unus spiritus est.* Per quam adhæsionem et manifestationem ac unionem communiter interpres, S. Thomas, *in Ps. xxxiii*, Toletus *in c. xiv Joan.*, Cornelius a Lapide *in c. xvii Act.* 18, Estius *in I Cor.* 2, et S. Salesius l. 7 *de Amor. Dei*, c. 1, specialem hujus vitæ ac experimentalem unionem animæ cum Deo, seu illapsum passivum intelligunt. 2º Suffragantur PP. S. Dionysius, c. 1 *Myst. Th.*, Timotheum monet: « Te ad ejus, qui omnem essentiam omnemque scientiam superat, conjunctionem et unitatem pro virili parte clam excita. » Quod Corderius de illapsu explicat. S. Augustinus l. 10 *Conf.*, c. 40, de hoc illapsu aliquando in se experto ait: « Aliquando intromittis me in affectum multū inusitatum introrsus ad nescio

quam dulcedinem, quæ si perficiatur in me, nescio quid erit, quod vita ista non erit. » S. Cyrillus, l. 10, *in Joan.*, c. 3, ait: « Dilucide docet, non solùm cognitione istâ communis amicis se suis manifestaturum, sed excellentiori quodam fulgoris modo. » S. Bernardus, *Serm. 3, in Cant.* inquit: « Tum demum audemus forsitan ad ipsum os gloriæ caput attollere, pavens et tremens dico, non solùm speculandum, sed etiam osculandum, quia spiritus ante faciem nostram Christus Dominus, cui adhærentes in osculo, unus spiritus ipsius dignatione efficimur. » S. Bonaventura, 6 *Itiner. aetern.*, ait: « Est aeternorum experimentalis prægustatio et notitia. Nisi enim esse in nobis aeternorum quædam experimentalis prægustatio, non diceret Psalmista: *Gustate, et videte.* Et addit: « Et ista notitia experimentalis perfectissimorum est. » Accedunt S. Laurentius Just. l. *de Cast. connub.*, c. 12, S. Catharina Senensis, *Dial.*, c. 79, B. Angela de Fulginio, *Vit.*, c. 28, S. Theresia, *Vit.*, c. 18, et in *Castell. mans.*, 5, S. Joannes a Cruce l. 2 *Asc. ad mont.*, c. 5, Thaulerus, *Inst. spir.*, c. 12, Gerson, *Th. Myst.*, p. 8, et *super Magnif.*, tr. 9, Blosius, in *Spec. spir.*, c. 11, et *inst. spir.*, c. 12 etc. 3º Ratio est: quia Deus pro summo suo in justas et perfectas animas amore, se eis communicare contendit modo unitivo, qui earum dispositioni conveniat, cum amor et amicitia ad unionem amantis cum amato, quantum fieri potest, tendat: sed pro ratione dispositionis animarum decet ut Deus se illis frequenter, vel saltem aliquoties per unionem illapsū passivi communicet, ut ex modò allatis locis S. Scripturæ et PP. et ex præcedentibus §§ patet: ergo etiam per eam se communicat.

EXPERIMENTALIS SENSATIO ILLAPSUS IN INTELLECTU ET VOLUNTATE
RESIDET.

SCHOL. I. Experimentalis spiritualis sensatio unionis contemplative illapsū residet, ex parte, in parte contemplativi cognoscitivæ, uti ex citatis textibus S. Scripturæ patet, ubi inter alia dicitur: *Læva ejus sub CAPITE meo.* Et *manifestabo ei me ipsum.* Et S. Cyrilus citatus eam per *fulgorem*, S. Bernardus per *faciem*, S. Bona-